

snadź hotowy dom za nju kupił. Tehdy běše tole rjane twarske městno něhdže 70000 hr. hódne. Zo by so lěpje zadaniło, wobzamkny so na Maćičnej hłownej zhromadźiznje 1896 po namjeće tehdyšeho kapłana Jakuba Šewčika we Worklecach, kotryž sam hnydom 100 hr. slubi a položi, zo ma so jutry 1897 cyle wěsće zakładny kamjeń k nowotwarej položiť, dokož budže M. S. swój 50 lětny jubilej swječić. Při tym napominaše dr. Muka, zo bychu wšitcy přítomni w napohladže tak blizkeho wuwjedenja našich dołholětnych žadanjow k jeho zmóžnjenju dary sćedrje składowali a pilnje w nastawacem jubilejnem lěće zběrali. Rěčnik Parczewski a kapłan Andrčki wuprajištaj přeće a namołwjenje, zo by předsydstwo serbski lud hišće bóle pisomnje wo naležnosći a wažnosći serbskeho Maćičneho doma rozwučowało a rozwučić dało.

Na hłownej zhromadźiznje 10. měrca 1897 postaji so nowy twarski wubjerk abo twarska komisija za nowotwarbu, do kotrejež so jenohłósnje wuzwolichu: předsyda Łusčanski, zarjadnik M. doma Bartko, wubjerkownik Mrózak-Budestečanski, sobustawy rěčnik Cyž a kapłan Nowak a k tomu kralowski twarski insp. K. Schmidt w Drježdžanach, Budyški měsćanski rada Wjeclich (Adolf Waclik), kotryž wšak bě dla skhorjenja nuzowany, sobuskutkowanja we wubjerku spuścić, a architekt Eisler, assistent při měsćanskem twarskem zarjadnistwje w Budyšinje.

Dr. Muka dósta poručenosć wot hl. zhromadźiznje nětko definitivnje wšo wujednać z architektom Grothe, po kotrehož naćiskach ma so twarić, a z twarskim inspektorom K. Schmidtom, kotremuž so dohlad nad twarom dowěri. Hłowna zhromadźizna žada znowa, zo by so do srjedźneje twarby M. doma hosćenc z restauraciju položil, a zo by předsydstwo hišće raz wo koncesiju k tomu so starało. Na namjet dra. Muki wuzwoli so hišće komisija za dobywanje srědkow za nowy Maćičny dom. Do tuteje słušachu: